

120—

M. DC. XIV.



LA RESIOVISSANCE

*de la France, Pour la reconciliation
de Messieurs les Princes.*

RESIOVISSEZ vous François, & donnez quelque trefue à vos larmes, & à vos plaintes: l'ay tousiours estimé que vostre apprehension seroit plus grande que vostre mal. Il ny peut auoir de contrarietez entre le Soleil & les astres, auxquels il communique sa lumiere, n'y de mauuaise intelligence entre le Roy, & Messieurs les Princes, lesquels tiennent leur honneur, leur qualité, & leurs biens à foy, & à hommage de sa Majesté. L'autori-

ré Royale est trop bien imprimée en la fidellité des François, pour faire aucune chose preiudiciable à son seruice & à leur obeyssance. La partie est en telle recommandation aux gens de bien, qu'ils en cherchent plustost la conseruation, qu'ils n'en procurent la perte. Themistocle quelque iuste subject qu'il eust, de se vanger des Atheniens, qui luy auoient donné des mescontentemens, pour les recompences de ses seruices, & de recognoistre les faueurs & le bon traitement qu'il auoit receu de Xerce, telà la verité qu'il confessoit luy-mesme, qu'il eust esté perdu, s'il n'eust esté perdu: ayma mieux se donner la mort, que d'agrádir le Sceptre de Perse à la ruyne de la Grece sa chere.

partie. Entre les animaux plus veneneux, il n'y en a point qui face mourir sa mere que la Vipere, tous les autres jettent leur venin sur les ennemis de leur repos. Quelle apparence donc y auroit-il, que des Princes nez pour la protection & pour la deffence de la France, en desirassent la perte ? ouurissent les entrailles qui les nourrissent, & arrachassent les mammelles qui les allaitent. Les enfans quelquefois se retirent de leur mere, & se jettent entre les bras de leur nourrice, & apres que leur iugement croit avec leur âge, se dedisans de leur premiere inclination, & ne voulans plus faire de traits d'enfance, preferent celle qui les a mis au monde, à celle de laquelle ils ont succé le

laict. Mais ces genereux Prin-
ces, font assez iudicieux pour
reconoistre, que la France leur
est mere & nourrice, & qu'ils
ne se peuuent retirer de l'une
qu'ils ne s'esloignent de l'autre.
Tout ainsi que le ciel menace
de sa foudre le Laurier, aussi bie
que le Cedre, & neantmoins il
ne le fait esclatter que bien loin
de luy: Je croy que toutes ces
troupes preparées es limites de
la France, iront faire reteter leurs
armes au milieu des mescreans,
pour anter des nouveaux Lau-
riers sur les palmes de leurs an-
cestres.

Il est vray que Monseigneur
le Prince est cest Hercule fatal
qui doit ayder à porter les char-
ges de la France. Sa presence y
est requise, où il n'aura pas

moins d'honneur en la conser-
 uant par sa prudence, qu'il en
 pourroit acquerir ailleurs par
 les effects de son courage. C'est
 le pilote qui doit tenir le gou-
 uernail de la barque, à fin de la
 faire surgir au port de salut : à
 lors la prosperité de la France
 fera prendre garde aux mer-
 ueilles de sa naissance, s'eston-
 nant de voir tant de valeur ac-
 compagner sa ieunesse, & tant
 de bonnes fortunes succeder
 de sa prudence, qu'il ne restera
 plus rien en l'accomplissémēt, &
 en la perfection de l'une & de
 l'autre, que de les continuer
 & de le reseruer au bien du
 Royaume. Ce sera lors que rou-
 tes les sinistres impressiōs qu'on
 auoit de son absence, seront
 effacees, faisant lire en ses

actions, que le seruice du Roy, apres celuy de Dieu, est le but principal de toutes les pensees, & de toutes les intentions. Ainsi le peuple qui ressentira les fruits de ses conseils, entrera en admiration de ses vertus particulieres, lesquelles luy acquereront plus de villes & de Prouinces, que ses armes ne luy en pourrôt soubmettre par force.

On dit souuent que les premieres impressions sont de si grande importance, qu'il est necessaire de bien commencer sa prise, en la possession d'une charge, non pas seulement par des actiōs irreprehensibles: mais qui soient infiniment louables, qu'il faut que l'entree en soit belle, si l'on veut que l'issuē en soit heureuse. Nous sommes

mes en vne faison, ou les peuples sôt assez enclins d'eux mesmes à reprendre les grands, & les Prouinces à se plaindre de ceux qui les gouuernent. Voila pourquoy il ne leur faut poit donner de iuste subiect, de reprehension n'y de plainte.

Monfieur de Neuers, qui a bon droit a de l'estime & de la renommee, tant pour auoir esté chercher les perils hors de la France, que pour auoir tousiours eu le seruice du Roy en recommandation, fera bien ayse de faire reüssir les promesses de ses armes sur les infidelles, tant pource que son ame genereuse ne peut arrester dans le calme, que pour se véger de la blesseure qu'il y reçoit, hazardât sa personne & sa vie en soldat auanturier.

& nō pas en Prince considérât. Aussi les exercices de Mars sont ses plus chers esbatemens, se ressouenant que c'est receuoir vn heureux dommage, que de perdre vn peu de plaisir in-vtile, pour acquerir de l'honneur de la reputation, & de l'autorité à la teste d'une armee, veu que les gouuernemens, les principautez, voire mesme les royautez, de qui les tiltres sont si specieux & manifiques, & dont le pouuoir semble si absolu, ne sont en effaiet que belles seruitudes, & fardeaux autant onereux qu'honorables, & desquels si on se vouloit acquitter dignement ceux qui les possèdent, n'auroient pas vne seule heure pour destiner à leur plaisir.

— Monsieur de Longueuille y

pourra semer les premiers fruits de sa proüesse, afin d'en moissonner à loisir les recompences, & de faire renaistre en sa ieunesse, les valeurs & la recommandation de son pere.

Monsieur de Mayenne heritant du zele & de la bonne fortune de ses ayeux y pourra contribuer ses forces, & celle de ses amis, tant pour recueillir les fruiçts que ses predecesseurs y ont semez que pour mettre en effaiçt les conseils, & les dernieres paroles de feu son pere, qui l'obligerët à la deffence de la foy Catholique, & au seruice de son Roy sous le seau de sa benediction.

Monsieur de Vendosme y pourra tesmoigner qu'il est fils naturel de ce Henry le Grand.

& q̃ les victoires familiares à ce Monarque s'ôt les fleaux des barbares, & l'heur de sa posterité.

Toute ceste noblesse François qui tranche les ailles à la victoire, pour l'empescher de voler plus loin que le bout de leurs espees, les suiuront à ceste honorable entreprise, remettât la peur & l'effroy entre ces Mahomettans, en sorte que ce sera assez pour les veincre, de dire que ce sont des François qui les combattent. C'est la où ceste Noblesse recommandable doit estre opiniastre, & doit donner preuue de la generosité de son courage, prenât garde aux perfections particulieres des Princes qui leur commanderont; Et vous Messieurs les Princes c'est ou vous deuez tascher que voz

actions respōdent à l'estime que l'on a de vostre prudence & de vostre valeur, afin de ne perdre facilement la creance qu'elle a de vostre reputation, ne trouuant en vous toutes les perfectiōs qu'elle se feroit imaginees.

Mais laissons les affaires d'Estat à ceux qui sont esleuez dans le commerce, & souuenōs nous seulement que la France est en la tutelle de son bō Ange: que le Roy est le soleil qui en dissipe les nuages, & qu'elle est obligee à la prudence & à la vigilance de la Royne, qui tenant les maximes de ceste vertueuse Princesse Blanche mere du Roy sainct Louys, veut achepter le repos des subiets du Roy sō Seigneur & Fils, sachās bien que les guerres intestines & ciuiles destrui-

sent les Monarchies, ne se pou-
uans entretenir que par la deso-
lation du peuple.

Elle à suiuy le cōseil des Prin-
ces & officiers de la couronne,
qui aymēt mieux donner preu-
ue de leur integrité, & de leur fi-
dele obeyssance en la tranqui-
lité du Royaume, que de se si-
gnaller, & d'aquerir des triom-
phes à la perte du public, & au
desaduantage des subiects du
Roy. Le chef de la iustice, Mes-
sieurs du Conseil, les Senateurs
des celebres Parlemēs de Fran-
ces, le Iuge de la Police, & to^{us}
les autres officiers de sa Majesté
y ont cōtribué leurs aduis salu-
taires, & vtilles à la prosperité
de ceste couronne. Bref le peu-
ple mesme a importuné le ciel
de ces prieres, afin de le regarder

en pitié, & de ne faire tomber
ses fleaux sur luy. Car tout ainſi
qu'il fait ouyr ſon tonnerre par
tout le monde, & ne le fait tom-
ber qu'en vn lieu: de meſme il
menace tous ceux qui luy ſont
deſobeyſſans, & n'échaptie que
quelques vns.

Sus donc François faićtes des
Feux de ioye, afin que la paix
que le Roy Henry le Grád vous
auoit acquiſe par ſa valeur, &
continuee par ſa bonté, demeu-
re entiere, inuiolable, & en la
meſme ſplendeur qu'il nous l'a-
uoit laiſſee: auſſi auons nous
trop d'obligation au Pere pour
nous diſpenſer de ſeruir le Fils.
Quand on treuue bon le fruit
d'un arbre on cóſerue ſoigneu-
ſement les greſſes & les reietts,
ſous eſperance qu'il produirót.

vn meſme fruit ou pour nous
ou pour les noſtres. Nous auôs
reſſenty tant de bienfaicts du
feu Roy que Dieu abſoluë, que
ſa memoire nous doit eſtre re-
commandable, & deuons auoir
l'œil à la proſperité du Roy ſon
fils noſtre Prince legitime, qui
nous eſt donné de Dieu pour
no^r ſeruir d'aſile, & pour heriter
des vertus & des poſſeſſions pa-
ternelles, avec vne fidelle aſſeu-
rance que nous en aurons les
meſmes aduantages, & les meſ-
mes liberalitez q̃ nous auôs eues
de feu ſa Maieſté ſon pere, ou
pour nous, ou pour noſtre po-
ſterité. Prions Dieu qu'il luy
plaiſe de nous le conſeruer pour
nous faire iouyr des fruits de ſa
grandeur & des promeſſes de ſa
naïſſance,

F I N.